

վասն զի յամենայն քաղաքս թուղթ առաքեցան յաթուակալացս և ի վարդապետացս վասն ոչ ընդունելոյ զնա, եւ այժմ գայ ասեն:

Կիրակի օրս (8 Յոնիս) գնացաք ի մեր ժամն եւ անտի ի Մղտեսոնցն և զՄղտեսի Խանուամն ի տեղն բերաք, վասն զի զկիւնն եւ զորդիսն բերեալ էր ի տեղս ի սահմանաց և ի բնակութենէ իւրեանց, որ կոչի Ակիւձոր, և վասն նեղութեան և հարկապահանջութեան տեղեացն, և ևս ի ժամանակիս եղեալ վիշտն՝ ի Սէյտի Ահմէտէն եղեալ անբաւ: Վասն այսօրիկ բազումք ելեալ ի տանց եւ ի բնակութեանց, թողեալ զայգի եւ զարտ, զհնձան եւ զկալ եւ զայլ ամենայն վայելչութիւն պարտէզից եւ բուրաստանից, զեզնիցն եւ զօշխարիցն, և եկեալ բնակեցան աստ ի քաղաքս որ կոչիւր Կոստանդնուպօլիս: Եւ զհացն անդ կերեալ եկն մեր Մինասն և առեալ տարաւ զմեզ ընդ ինքեանս ի սէյր, որ էր Հաճի Աբտուլան, Մղտեսի Պօղոսն, եւ այլ ի մերայնօց մեր եկեղեցւոյն Զ Է ոգի գնացեալ նստաք ի Ղուզղունձուխն և երեկոյիս եկաք ի տուն:

Բշի (9 Յոնիս) առաւօտուս նստեալ ընդ նոսա ի Մղտեսոնցն և ապա ելեալ գնացի ի խանութ: Եւ յետ կէս աւուրս եկն Սէյտի Ահմէտ փաշան սակաւ արամբք՝ վստահացեալ յերգմունս թագաւորին թէ Ե՛կ և ես ոչինչ առնեմ, և մտեալ ի թագաւորն, ել գնաց ի տուն իւր: Եւ երեկոյիս գնացեալ ի տուն եւ նստաք անդ և ելեալ պառկեցաք և հաւն խօսեցաւ: Աւուրքս սըրայ ղօլին խիստ կու նեղացնէր զամենեսեան, որ ունէին սակաւ ինչ նորագոյն հանդերձ, և ոչ միայն զՀայս այլ և զՏաճիկս:

Ի գիշերիս և առաւօտիս Գշի (10 Յոնիս) անձրև եկաւ: Եւ օրս ելեալ գնացին Խանուամնք ի տունս իւրեանց և երեկոյիս մեք անդ կացաք: Եւ օրս գային ի յմսկիւտարու արք և զօրք Սէյտի Ահմէտին: